

# 蓮宗九祖略傳

---

佛學小叢書

---

上海佛學書局印行

# 序

粵自東林倡社獨起蓮宗。到今千四百餘載。而念佛往生淨土者。止就今時一隅之地。猶及見及聞。班班可考。足徵從上以來。何可勝計哉。世傳往生集久矣。然所紀者。不啻取一而漏萬也。宋石芝曉師。嘗定蓮宗祖師七人。曰蓮宗七祖。意謂千古相延。接傳正脈者也。俾後之人奉爲家法。弗致散雜。而或趨於歧路。可謂善矣。美矣。旣而前明衆舉雲棲爲八。而本朝雍正年間。復衆舉省庵法師爲九祖。斯九祖者。皆智慧功德不可思議。凡淨業之士。旣心歸安養。復以慧命爲懷。乃追溯源流而克承其緒。爲何如哉。然未見專

書。僅存羣冊。開因是歷覽諸文。摘編成卷。名蓮宗九祖傳略。嗟乎。末世衆生。最宜念佛。佛已明言之矣。十方諸佛。又讚歎之矣。自古及今。念佛而往生者。若緇若素。若男若女。若老若少。衆見衆聞。又昭灼於耳目之間者矣。尙何疑之有。而不信之耶。雖然。信則信矣。修則修矣。而知見不正。亦不可也。因卽是書。譬如規矩之作。遵循何患乎其不正哉。一則不忘列祖慈化之恩。一則助已出世正修之路。是書也。安可少乎。爰是付之剞劂。願同志道。倡見而隨喜。以廣流傳。用資來學云爾。時道光四年歲次甲申秋古吳後學悟開書於雲間蓮華蘭若之水雲廬。

小佛  
叢書

# 蓮宗九祖傳略

九祖

清古吳後學悟開編

圓悟大師廬山東林慧遠和尚

長安光明善導和尚

衡山般舟承遠大師

衡州雲峯法照國師

新定烏龍少康大師

妙圓正修智覺禪師杭州永明延壽和尚

武林昭慶省常律師

古杭雲棲蓮池大師

鳳山梵天省庵法師

蓮宗初祖

祖諱慧遠。姓賈。雁門樓煩人。幼而好學。博綜六經。時道安禪師建刹於太行恆山。祖往歸之。聽講般若經。豁然開悟。因投簪受業。精

思諷誦。以夜繼晝。師歎曰。使道流東國者。其在遠乎。晉太元六年。過潯陽。見廬山閒曠。可以棲止。乃立精舍。名龍泉寺。時祖同門慧永禪師。先居廬山西林。欲邀同止。而祖學侶寢衆。西林隘不可處。刺史桓公爲祖更立寺于山東。遂號東林。祖於是率衆行道鑿池種蓮。於水上立十二葉蓮華。因波隨轉。分刻晝夜。以爲行道之節。旣而四方清信之士。聞風而至者百二十三人。祖曰。諸君之來。能無意於淨土乎。乃造西方三聖像。建齋立社。令劉遺民著發願文。勒之石。時王喬之等數人。復爲念佛三昧詩。以見志。祖爲作序曰。夫稱三昧者何。專思寂想之謂也。思專則志一。不分。想寂則氣虛。

神朗。氣虛則智悟其照。神朗則無幽不徹。是二者自然之元符。會一而致用也。又諸三昧。其名甚衆。功高易進。念佛爲先。何者。窮元極寂。尊號如來。體神合變。應不以方。故令人斯定者。昧然忘知。卽所緣以成鑒。鑒明則內照交暎。而萬象生焉。非耳目之所暨。而聞見行焉。於是靈相湛一。清明自然。元音叩心。滯情融朗。非天下之至妙。孰能與於此哉。所以奉法諸賢。咸思一揆之契。感寸陰之將頽。懼來儲之未積。洗心法堂。整襟清向。夜分忘寢。夙興唯勤。庶夫貞詣之功。以通三乘之志。仰援超步。拔茅之興。俯引弱進。垂策其後。以此覽衆篇之揮翰。豈徒文詠而已哉。祖以江東經藏多缺。遣

弟子遠越葱嶺。購諸梵本。並傳關中。所有經律。出諸廬山。幾至百卷。嘗造法性論。以明泥洹常住之旨。什師見而歎曰。邊方未見大經。便闇與理合。居山三十年。跡不入俗。專志淨土。澄心觀想。三見聖相。而沈厚不言。義熙十二年七月晦夕。於般若臺方從定起。見阿彌陀佛身滿虛空。圓光之中。有諸化佛。觀音勢至左右侍立。又見水流光明。分十四支。回注上下。演說苦空無常無我之音。佛告言。我以本願力故。來安慰汝。汝後七日。當生我國。又見社中先化者。佛陀那舍慧持慧永劉遺民等皆在側。前揖曰。師早發心。何來之晚。祖謂弟子法淨惠寶曰。吾始居此十一年中。三覩聖相。今復



再見。吾生淨土必矣。卽自製遺誡。端坐入寂。年八十三。卽義熙十二年八月六日也。弟子等奉全身塔於西嶺。謝靈運宗炳各立碑以銘遺德。所著有廬山集十卷行世。唐宣宗大中二年。追諡辯覺大師。昇元三年。追諡正覺。宋太宗太平興國三年。追諡圓悟大師。凝寂之塔。

悟開曰。晉太元中。遠祖始以淨土法門。建立蓮社。一時高僧名士多歸之。曰思專想寂。當知此四字。卽是念佛祕要元關。厥後往生諸賢。顯驗不一。嗚呼。盛矣。萬世而下。不可得而思議者歟。

蓮宗二祖

祖諱善導。不詳其所出。人皆稱善導和尚。云是阿彌陀佛化身也。唐貞觀中。見西河綽禪師淨土九品道場。喜曰。此真入佛之精要。修餘行業。迂僻難成。唯此法門。速超生死。於是勤篤精苦。晝夜禮誦。旋至京師。激發四衆。每入室。長跪唱佛。非力竭不休。出則演說淨土法門。三十餘年。未嘗睡眠。護持戒品。纖毫不犯。好食供衆。麤惡自奉。所有勳施。用寫阿彌陀經十萬餘卷。畫淨土變相三百餘壁。修營塔寺。然燈續明。道俗從其化者甚衆。有誦彌陀經十萬至五十萬徧者。有日課佛名一萬至十萬者。其間得三昧。生淨土者。不可紀述。或問念佛生淨土邪。祖曰。如汝所念。遂汝所願。或問何

故不令人作觀。直遣專稱名號。邪祖曰。衆生障重。境細心麤。識颺神飛。觀難成就。是以大聖悲憐。直勸專稱名字。正由稱名易故。相續卽生。若能念念相續。畢命爲期者。十卽十生。百卽百生。何以故。無外雜緣得正念故。與佛本願相應故。不違教故。順佛語故。若捨專念。修雜業者。百中希得一二。千中希得三四。何以故。雜緣亂動。失正念故。與佛本願不相應故。與教相違故。不順佛語故。繫念不相續故。心不續念。報佛恩故。雖作行業。常與名利相應故。雖作行業。而樂近雜緣。自障障他。往生正行故。願一切人等。善自思惟。行住坐臥。必須厲心克己。晝夜莫廢。畢命爲期。前念命終。後念卽生。

永劫受無爲法樂。乃至成佛。豈不快哉。其勸世偈曰。漸漸鷄皮鶴髮。看看行步龍鍾。假饒金玉滿堂。豈免衰殘病苦。任汝千般快樂。無常終是到來。唯有徑路修行。但念阿彌陀佛。又作臨終正念文曰。凡人臨終欲生淨土者。須是不得怕死。當念此身多苦。不淨惡緣。種種交纏。若得舍此穢身。超生淨土。受無量快樂。解脫生死苦趣。乃是稱意之事。如脫弊衣。得換珍服。放下身心。莫生戀着。纔遇有病。便念無常。一心待死。須囑家人及問候人。來我前者。爲我念佛。不得說眼前閒雜之話。家中長短之事。亦不須軟語安慰。祝願安樂。此皆虛華無益。若至將死。親屬不得垂淚哭泣。及嗟嘆之聲。

徒然惑亂心神。反使失其正念。但教記取阿彌陀佛。守令氣盡。若得明解淨土之人。頻來策勵。極爲大幸。用此法者。決定往生無疑慮也。死門甚大。須自家着力始得。一念差錯。歷劫受苦。誰人相代。思之思之。祖念佛一聲。有一光明從其口出。十至於百。光亦如之。忽一日。謂人曰。此身可厭。吾將西歸。乃登寺前柳樹。向西祝曰。願佛接我。菩薩助我。令我不失正念。得生安養。言已。投身而逝。高宗知其神異。賜寺額曰光明。

悟開曰。廬山而後二百年。出善導和尚。大揚法化。丕振蓮宗。其曰如汝所念。遂汝所願。又言專念者。十卽十生。百卽百生。修雜

業者。百中希得一二。千中希得三四。其得失關頭。在於與佛本願相應不相應處。末後臨終正念文。剴切指陳。可謂慈心太切矣。學者當識取正派源頭如是。

### 蓮宗三祖

祖諱承遠。不詳其所出。始學於成都唐公。次資川詵公。至荊州。進學於玉泉真公。公令居衡山設教。人從而化者萬計。始居山西南巖石下。人遺之食則食。不遺則食土泥。羸形垢面。躬負薪爨。凡化人立中道而教之。權俾得以疾至。示專念法門。書塗巷。刻溪谷。不勤誘掖。人皆負布帛。斬木石。委之巖石。祖不拒不營。祠宇旣具。賜

額彌陀寺。營造之餘。悉施與餓疾者。先是有沙門法照者。居廬山。由正定中趨安樂國。見蒙惡衣侍佛者。佛告曰。此衡山承遠也。出而求之。肖焉。乃從之學。傳教天下。嗣照於代宗時爲國師。見柳子厚集南碑言其師有至德。欲徵之。度其不可。天子南嚮而禮焉。賜其居曰般舟道場。貞元十八年七月十九日示寂於寺。年九十一。柳宗元製碑立石寺門之右。

悟開曰。羸形垢面。尙在娑婆。而正定中人。已見侍佛側矣。苟非潛修密證之功。曷臻乎此。吁。真不愧爲蓮宗祖。

蓮宗四祖

祖諱法照。不詳其所出。大歷二年居衡州雲峯寺。勤修不懈。一日於僧堂粥鉢中。覩五色祥雲。雲內現山寺。寺東北有山。山下有澗。澗北有石門。門內復有一寺。榜曰大聖竹林寺。他日復於鉢中見雲中數寺。池臺樓觀。萬菩薩衆雜處其中。以所見問知識。有一僧曰。聖神變化不可情測。若論山川勢面。乃五臺也。四年祖於郡之湖東寺開五會念佛道場。感祥雲彌覆。雲中現樓閣。阿彌陀佛及二菩薩。身滿虛空。衡州舉郭咸焚香瞻禮。良久方滅。祖復遇一老人。謂曰。汝曾發願往金色世界禮覲大聖。今何輒止。言訖不見。祖遂與同志數人。遠詣五臺。五年四月六日。至五臺縣佛光寺。其夕



四更遙見異光照身。卽之行五十里。得一山。山下有澗。澗北有一石門。見二童子。自稱善財。難陀引至一寺。榜曰大聖竹林寺。如鉢中所見。金地寶樹。以爲莊嚴。入寺登講堂。見文殊在西。普賢在東。坐師子座。萬衆圍繞而爲說法。祖作禮問曰。末代凡夫。去聖時遠。知識隘劣。障垢尤深。佛性無由顯現。佛法浩瀚。未審修何法門。最爲其要。文殊告曰。汝今念佛。今正是時。諸修行門。無過念佛。供養三寶。福慧雙修。此之二門。最爲徑要。我於過去劫中。因觀佛故。因念佛故。因供養故。得一切種智。是故一切諸法。般若波羅蜜甚深禪定。乃至諸佛。皆從念佛而生。故知念佛。諸法之王。祖問當云何。

文。念殊言此世界西。有阿彌陀佛。彼佛願力不可思議。汝當繼念。令無間斷。命終決定往生。永不退轉。語已。二大聖同舒金臂。摩祖頂。曰。汝以念佛故。不久證無上正等菩提。若善男女等。願疾成佛者。無過念佛。則能速證無上菩提。祖歡喜作禮。辭而退。二童子送出寺門。舉頭忽失所在。乃立石標記其處。至四月十三日。祖與五十餘僧。同往金剛窟。虔心禮三十五佛。名祖禮纔十徧。忽見其處廣大巖淨。琉璃宮殿。文殊普賢俱在一處。復獨詣金剛窟所。願見大聖。以身撲地。見梵僧佛陀波利。引入一院。額曰金剛般若寺。異寶莊嚴。光明閃爍。祖雖歷觀靈異。而未語人。是年十二月。於華

嚴寺入念佛道場絕粒要期。誓生淨土。至七月初夜正念佛時。見一梵僧入謂曰。汝所見臺山境界。胡不傳示世人。言畢不見。祖心異之。翌日。又見梵僧語如前。祖曰。非敢秘密聖道。恐生疑謗耳。僧曰。大聖文殊。現在此山。尙招人謗。汝何惜焉。但以所見境界。普告衆生。使見聞者發菩提心。作毒鼓緣耳。祖遂憶所見。錄以傳世。明年江東沙門慧從。與華嚴寺諸僧。隨祖至金剛窟。及立石標記處。瞻仰舊跡。大眾悲喜未已。忽聞鐘聲。其音雅亮。節解分明。衆愈驚異。知祖所見不虛。因書於屋壁。願見聞者共發勝心。後於化竹林寺題額處。建寺一區。仍號竹林焉。祖於是篤志念佛。日夜無曠。忽

見佛陀波利謂曰。汝華已就。後三年華開矣。至期謂衆曰。吾行矣。端坐而逝。祖嘗於并州五會念佛。及詔入京。封國師。教宮人念佛。亦及五會云。

悟開曰。寄文殊金口。親揚念佛法門。寄四祖凡身。眼見五臺聖境。誠浩劫中難遇難逢莫大之因緣也。揆厥其旨。無非大菩薩入五濁惡世。化度羣迷。令早覺悟。如教修持。超脫苦輪而已。

### 蓮宗五祖

祖諱少康。姓周。縉雲仙都山人。母羅氏。七歲未語。母攜入靈山寺禮佛。母問識否。忽發言曰。釋迦牟尼佛。父母遂捨之出家。年十五。

能通五部經。尋往會稽嘉祥習律。復詣上元龍興聽講。貞元初。至洛陽白馬寺。見殿中文字放光。探之。則善導和尚西方化導文也。祖祝曰。若於淨土有緣。當使此文再見光明。言已。光復閃爍。光中隱隱有化菩薩。祖曰。劫石可磨。我願無易矣。遂至長安光明寺善導和尚影堂瞻禮。忽見真像升空。謂曰。汝依吾教廣化有情。他日功成。必生安養。祖南至江陵。遇一僧謂曰。汝欲化人。當往新定。緣在於彼。言訖不見。乃適新定。乞錢。誘小兒念佛。念佛一聲。卽與一錢。如是年餘。凡男女少長見祖。皆稱阿彌陀佛念佛之聲。盈於道路。遂於烏龍山建淨土道場。築壇三級。每遇齋日。善信畢集。祖乃

升座高聲唱佛。衆共和之。祖唱一聲。衆見一佛從口出。十聲則十佛。若貫珠焉。祖謂衆曰。見佛者必得往生。衆聞欣慰。念佛益勵。二十一年十月。囑道俗曰。大衆當於淨土起增進心。於閻浮提起厭離心。汝等此時見我光明。真我弟子。言已。遂放異光數道。寂然而逝。那人建塔於臺巖。

悟開曰。念佛一聲。口出一佛。此菩薩境界。非造作而然也。學者當觀其化導之權巧。隨機施設。爲天下後世法。才見得祖師本意。

### 蓮宗六祖

祖諱延壽。字沖元。錢塘王氏子。自少誦法華經。錢文穆王時。知稅務。多用官錢買放生。命罪當死。引赴市曹。王使人矚之。色不變。命釋之。祖遂投四明翠巖禪師出家。後參天台韶國師。言下大徹。旋受爲法眼嫡孫。嘗於禪觀中。見觀世音菩薩。以甘露灌其口。因是獲大辯才。祖欲並宏淨土之教。登智者禪院作二鬪。一曰一心禪定。一曰萬善莊嚴淨土。冥心精禱。七拈得淨土鬪。於是一意兼修淨業。建隆二年。忠懿王請住慧日永明寺。賜號智覺禪師。日課一百八事。夜往別峯行道念佛。旁人時聞螺貝天樂之音。著宗鏡錄百卷。會融諸法同入心宗。又著萬善同歸集六卷。發明空有性相。

之旨。提策眞修。歸之中道。節錄數條。明乎淨業。一問論云。行道念佛。與坐念佛。功德如何。答譬如逆水張帆。猶云得往。更若張帆順水。速疾可知。坐念一日。尙乃八十億劫罪消。行念功德。豈知其量。故偈云。行道五百徧。念佛一千聲。事業常如此。西方佛自成。二問。卽心是佛。何須外求。若認他塵。自法卽隱。答諸佛法門。亦不一向。皆有自力他力。自相共相。十元門之該攝。六相義之融通。隨緣似分。約性常合。從心現境。境卽是心。攝所歸能。他卽是自。且如課念尊號。故有明文。唱一聲而罪滅塵沙。具十念而形棲淨土。拯危拔難。殄障消冤。非但一期暫拔苦津。託此因緣。終投覺海。寶王論云。



浴大海者。已用於百川。念佛名者。必成於三昧。亦猶清珠下於濁水。濁水不得不清。念佛投於亂心。亂心不得不佛。既契之後。心佛雙亡。雙照。雙亡。定也。雙照。慧也。定慧既均。亦何心而不佛。何佛而不心。心佛既然。則萬境萬緣。無非三昧也。誰復患之於起心動念。高聲稱佛哉。三問觸目菩提。舉足皆道。何須別立事相道場。役念勞形。豈偕妙旨。答道場有二。一理道場。二事道場。理道場者。周徧剎塵。事道場者。淨地嚴飾。卽事明理。須假莊嚴。從俗入真。唯憑建立。爲歸敬之本。作策發之門。觀相嚴心。自他兼利。上都儀云。夫歸命三寶者。要指方立相。住心取境。不明無相離念也。佛懸知凡夫。

繫心尙乃不得。况離相耶。如無術通人。居空造舍也。金剛三昧經云。有二入。一理入。二行入。以理導行。以行圓理。又菩提者。以行入無行。以行者緣一切善法。無行者不得一切善法。豈可滯理虧行。執行違理。大乘起信論云。信成就。發心有三。一直心。正念真如法。故。二深心。樂集一切諸善行。故。三大悲心。欲拔一切衆生苦。故。四問有人久修不證者何耶。答經云。衆生心如鏡。鏡垢像不現。又作四料揀云。有禪無淨土。十人九錯路。陰境若現前。瞥爾隨他去。無禪有淨土。萬修萬人去。但得見彌陀。何愁不開悟。有禪有淨土。猶如帶角虎。現世爲人師。當來作佛祖。無禪無淨土。鐵牀并銅柱。萬

劫與千生。沒箇人依怙。居永明十五年。弟子一千七百人。常與衆授菩薩戒。施食放生。迴向淨土。開寶八年二月二十六日晨起。焚香告衆。跌坐而化。年七十二。後有僧經年繞其塔。人問故。曰。我病入冥。見殿左供一僧像。王勤禮拜。因詢之。曰。杭州永明壽禪師也。已往生西方上品。王重其德。故禮敬耳。崇寧中。追謚宗照禪師。本朝

世宗憲皇帝。加封妙圓正修智覺禪師

悟開曰。修道之士。頗具好心。奈根器偏枯。動止輒病。祖愍此輩。故不憚煩勞。諄諄化導。坐斷一切狂慧口舌。解散一切義學籬

籬。精修萬行。莊嚴淨土。皆過量大人之作略。人豈得而擬議者哉。

### 蓮宗七祖

祖諱省常。字造微。姓顏。錢唐人。七歲出家。十七進具。宋淳化中。住南昭慶。慕廬山之風。謀結蓮社。刻無量壽佛像。刺血書華嚴淨行品。於是易蓮社爲淨行社。士夫與會者百二十人。皆稱淨行弟子。王文正公且爲之首。比丘及千人焉。天禧四年正月十二日。祖端坐念佛。有頃。厲聲唱曰。佛來也。泊然而化。衆見地色皆金。移時方隱。年六十二。弟子奉全身塔於烏窠禪師之側。

悟開曰。自二祖振興以來。唐代連綿昌盛。五季入宋。於時稍晦。三百年於茲矣。永明禪師以宗門龍象。並尊淨業。常祖嚴護。木又主張蓮社。於是先後中興。隆隆千古。修淨業者。信行願。如鼎三足。缺一不可。無如年代愈晚。根器愈薄。雖有信願而行門恆虧。蓮社易名淨行社。良有深旨。

蓮宗八祖

祖諱祿宏。字佛慧。號蓮池。古杭仁和人。俗姓沈氏。世爲名族。父德鑑。號明齋先生。母周氏。祖生而穎異。年十七。補諸生。以學行稱。忽悟生死事大。自此棲心淨土。戒殺生。祭必素。娶婦張。生一子。殤頃

婦亦亡。母強之續。納湯氏。然祖意非欲也。年三十一。父母俱喪。因泣曰。罔極之恩。正吾報答時矣。祖乃作一筆鈎詞。棄家投西山。性天和。尙祝髮。乞昭慶玉律師受具。於是杖策遊方。徧參知識。過東昌。忽有悟。隆慶五年。乞食雲棲。見山水幽絕。居焉。山故多虎。爲放瑜伽。噉口。虎不爲患。歲亢旱。居民乞禱雨。祖唯唱佛名。雨隨注。衆悅。相與庀材造屋。衲子日歸。遂成叢席。祖施設門庭。專修淨業。外嚴淨毗尼。尊崇講誦。明因果。識罪福。整飭清規。眞修實行。凡所謂欺世盜名者。無可施其伎倆。世皆謂祖祇宏淨土。而不知末法中之普光明藏也。著有雲棲法彙一書。眞度世之寶筏。而法門之柱。

石。其彌陀疏鈔闡發事理一心。至爲淵奧。自蓮宗建立以來未曾有也。嘉言偉績。備載全書。譬夫龍宮之寶。難以指陳。但好學之士。所宜捧讀而領會者矣。祖開法四十餘年。道播宇宙。從其化者甚衆。萬歷四十三年六月杪。入城別諸故舊。七月朔晚入堂。曰。明日吾行矣。次夕入丈室。示微疾。瞑目坐。城中諸弟子畢至。復開目曰。大衆。老實念佛。莫捏怪。莫壞我規矩。向西稱佛名而逝。祖生於嘉靖十四年正月二十二日。示寂於萬歷四十三年七月四日。僧臘五十。世壽八十有一。得度弟子廣孝等。并及門授戒者。不下數千計。縉紳士君子及門者。亦以千計。本年八月二十三日。入塔於寶

刀隴之陽。卽五雲之麓也。

悟開曰。去常祖五百五十年而雲棲出。方雲棲之未出也。禪道式微。蓮宗寥落。適當龍池出世。而直指復昌。念佛法門則振起雲棲。是時天下佛法爲之大盛。然其策厲清規。嚴明梵行。以救夫末世疲弊之習。而使靈中一會。光明再顯者。於蓮祖爲尤長也。迨今二百餘年。而天下學道者。念佛居多。且必曰雲棲。是知蓮祖之遺風猶在焉。

### 蓮宗九祖

祖諱實賢。字思齊。號省庵。常熟時氏子。世業儒。祖生卽不苟輩。甫



總角便有出塵志。父早喪。母氏張。知其善根夙具。遂命出家焉。年七歲。禮清涼庵容選爲師。十五薙染。二十四圓具於昭慶。嚴習毗尼。而脇不帖席者。率以爲常。尋入講筵。明性相之學。歲甲午。叩靈鷲和尙於崇福。參念佛者是誰話。四閱月。忽然開悟。曰。我夢覺矣。因是機鋒迅利。作辦縱橫。和尙欲付以衣拂。弗受。遂禁足於真寂。晝覽藏經。晚持佛號。己亥春。詣阿育王山瞻禮舍利佛涅槃日。大合緇白。廣修供養。然指佛前。發四十八大願。感舍利放光。作勸發菩提心文。激厲四衆。誦者多爲涕下。其文曰。嘗聞入道要門。發心爲首。修行急務。立願居先。願立則衆生可度。心發則佛道堪成。苟

不發廣大心。立堅固願。則縱經塵劫。依然還在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尚爾。况未發乎。故知欲學如來乘。必先具發菩薩願。不可緩也。然心願差別。其相乃多。若不指陳。如何趣向。今爲大衆略而言之。相有其八。所謂邪正真僞大小偏圓是也。云何名爲邪正真僞大小偏圓耶。世有行人。一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之曰邪。既不求利養名聞。又不貪欲樂果報。唯爲生死。爲菩提。如是發心。名之爲正。念念上求佛道。心心下化衆生。聞佛道常遠。不生退怯。觀衆生

難度。不生厭倦。如登萬仞之山。必窮其頂。如上九層之塔。必造其顛。如是發心。名之爲眞。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染汚。如是發心。名之曰僞。衆生界盡。我願方盡。菩提道成。我願方成。如是發心。名之爲大。觀三界如牢獄。視生死如冤家。但期自度。不欲度人。如是發心。名之爲小。若於心外見有衆生。及以佛道願度。願成。功勛不忘。知見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心別有。以虛空之心。發虛空之願。行虛空之行。證虛空之果。亦無虛空之相可得。如是發

心。名之爲圓。知此八種差別。則知審察。知審察。則知去取。知去取。則可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞。去小去偏。取正取真。取大取圓。如此發心。方得名爲真正發菩提心也。此菩提心。諸善中王。必有因緣。方得發起。今言因緣。略有十種。何等爲十。一者念佛重恩故。二者念父母恩故。三者念師長恩故。四者念施主恩故。五者念衆生恩故。六者念生死苦故。七者尊重已靈故。八者懺悔業障故。九者求生淨土故。十者爲念正法得久住故。云何念佛重恩。謂我釋迦如來最初發心。爲我等故。行菩薩道。經無量劫。備

受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世世生生。隨逐於我。心無暫捨。佛初出世。我尙沈淪。今得人身。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。邱山難喻。自非發廣大心行。菩薩道。建立佛法。救度衆生。縱使粉骨碎身。豈能酬答。是爲發菩提心第一因緣也。云何念父母恩。哀哀父母。生我劬勞。十月三年。懷胎乳哺。推乾去濕。嚙苦吐甘。才得成人。指望紹繼門風。供奉祭

祀。今我等既已出家。濫稱釋子。忝號沙門。甘旨不供。祭掃不給。生不能養其口體。死不能導其神靈。於世間則爲大損。於出世又無實益。兩途既失。重罪寧逃。如是思惟。唯有百劫千生。常行佛道。十方三世。普度衆生。則不唯一生父母。生生父母。俱蒙拔濟。不唯一人父母。人人父母。盡可超昇。是爲發菩提心第二因緣也。云何念師長恩。父母雖能生育我身。若無世間師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等羸知禮義。略解佛法。袈裟披體。戒品霑身。此之重恩。從師長得。若求小果。僅能自利。今爲大乘。普願利人。則世出世間二

種師長。俱蒙利益。是爲發菩提心第三因緣也。云何念施主恩。謂我等今者日用所資。並非己有。三時粥飯。四季衣裳。疾病所須。身口所費。此皆出自他力。將爲我用。彼則竭力躬耕。尙難餬口。我則安坐受食。猶不稱心。彼則紡織不已。猶自艱難。我於衣服有餘。寧知愛惜。彼則華門蓬戶。擾攘終身。我則廣宇間庭。優悠卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報寧逃。是爲發菩提心第四因緣也。云何念衆生恩。謂我與衆生從曠劫來。世世生生。互爲父母。彼此有恩。今雖隔世。昏迷互不相識。以

理推之。寧無報效。今之披毛戴角。安知非昔爲其子乎。今之蠕動  
蜎飛。安知不曾爲我父乎。每見幼離父母。長而容貌都忘。何況宿  
世親緣。今則張王寧記。彼其號呼於地獄之下。宛轉於餓鬼之中。  
苦痛誰知。饑虛安訴。我雖不見不聞。彼必求拯求濟。非經不能陳  
此事。非佛不能道此言。彼邪見人。何足以知此。是故菩薩觀於螻  
蟻。皆是過去父母。未來諸佛。常思利益。念報其恩。是爲發菩提心  
第五因緣也。云何念生死苦。謂我與衆生。從曠劫來。常在生死。未  
得解脫。人間天上。此界他方。出沒萬端。升沈片刻。俄焉而天。俄焉  
而人。俄焉而地獄。畜生餓鬼。黑門朝出而暮還。鐵窟暫離而又入。



登刀山也。則舉體無完膚。攀劍樹也。則方寸皆割裂。熱鐵不除饑。吞之則肝腸盡爛。烱銅寧療渴。飲之則骨肉都糜。利鋸解之則斷而復續。巧風吹之則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始凝。則狀似青蓮蕊結。血肉既裂。則身如紅藕花開。一夜死生。地下每經萬徧。一朝苦痛。人間已過百年。頻煩獄卒疲勞。誰信闍翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。牽豕就屠。寧識乃翁之痛。食其子而不知。文王尙爾。啖其親而未識。凡類皆然。當年恩愛。今作冤家。昔日寇讎。今成骨肉。昔爲母而今爲婦。舊是翁而新作

夫宿命知之。則可羞可恥。天眼視之。則可笑可憐。糞穢叢中。十月包藏難過。膿血道裏。一時倒下可憐。少也何知。東西莫辨。長而有識。貪欲便生。須臾而老病相尋。迅速而無常。又至風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也猶易。神之欲謝。其去體也倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峨峨積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理寧知寧覺。其或依前貪戀。仍舊癡迷。祇恐萬劫千生。一錯

百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。興言及此。能不寒心。是故宜應斷生死流。出愛欲海。自他兼濟。彼岸同登。曠劫殊勛。在此一舉。是爲發菩提心。第六因緣也。云何尊重已靈。謂我現前一心。直下與釋迦如來無二無別。云何世尊無量劫來。早成正覺。而我等昏迷顛倒。尙做凡夫。又佛世尊。則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被

濯。懸在高幢。洞達光明。映蔽一切。可謂不孤佛化。不負已靈。是爲發菩提心第七因緣也。云何懺悔業障。經言犯一吉羅。如四天王壽。五百歲墮泥犁中。吉羅小罪。尙獲此報。何況罪重其報難言。今我等日用之中。一舉一動。恆違戒律。一殮一水。頻犯尸羅。一日所犯亦應無量。何況終身歷劫所起之罪。更不可言矣。且以五戒言之。十人九犯。少露多藏。五戒名爲優婆塞戒。尙不具足。何況沙彌比丘菩薩等戒。又不必言矣。問其名。則曰我比丘也。問其實。則不足優婆塞也。豈不可愧哉。當知佛戒。不受則已。受則不可毀犯。不犯則已。犯則終必墮落。若非自慙慙他。自傷傷他。身口併切。聲淚

俱下。普與衆生。求哀懺悔。則千生萬劫。惡報寧逃。是爲發菩提心。第八因緣也。云何求生淨土。謂此土修行。其進道也難。彼土往生。其成佛也易。易故。一生可致。難故。累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃致。言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念奚爲。發心原爲修行。淨土不生。則雖發易退。是以下菩提種。耕以念佛之犁。道果自然增長。乘大願船。入於淨土之海。西方決定往生。是爲發菩提心第九因緣也。云何令

正法久住。謂我世尊無量劫來。爲我等故。修菩提道。難行能行。難忍能忍。因圓果滿。遂致成佛。旣成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高。不能覆我。地雖厚。不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運於此時。決當圖護持正法於來世。是故偕諸善友。同到道場。述爲懺摩。建茲法會。發

四十八之大願。願願度生。期百千劫之深心。心心作佛。從於今日。盡未來際。畢此一形。誓歸安養。既登九品。回入娑婆。俾得佛日重輝。法門再闡。僧海澄清於此界。人民被化於東方。劫運爲之更延。正法得以久住。此則區區真實苦心。是爲發菩提心第十因緣也。如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。況今我等又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大衆愍我愚誠。憐我苦志。同立此願。同發是心。未發者今發。已發者增長。已增

長者今令相續。勿畏難而退怯。勿視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任其自枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尙可追。然迷而不悟。固可哀憐。苟知而



不行。尤爲痛惜。若懼地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心眞則事實。願廣則行深。虛空非大。心王爲大。金剛非堅。願力最堅。大衆誠能不棄我語。則菩提眷屬。從此聯姻。蓮社宗盟。自今締好。所願同生淨土。同見彌陀。同化衆生。同成正覺。又作警世偈云。茫茫大夢中。長夜誰能寤。反戀夢中歡。將醒還重做。做得不如前。一錯是百錯。做得勝如前。依然空懺懺。造了夢中業。從苦又入苦。勸君早回頭。直走西方路。萬緣都放下。勤修淨業課。日夜望還鄉。一心求覺悟。豁然

心地空。卽是真淨土。彌陀忽現前。原來是這箇。祖嘗應永福普慶海雲仙林諸席。三根普攝。法化洋溢。緇白傾心。翕然歸仰。雍正七年結蓮社。爲文誓衆。以畢命爲期。判日課爲二十分。十分持名。九分作觀。一分禮懺。己酉冬。杭人請主梵天。於是屏絕諸緣。力修淨業。十一年臘月八日。告弟子曰。明年四月。吾去矣。遂掩關一室。日課佛名十萬聲。明年四月十二日。告衆曰。月朔以來。再見西方三聖。其將往生乎。卽書偈云。身在華中佛現前。佛光來照紫金蓮。心隨諸佛往生去。無去來中事宛然。於是具浴更衣。斷食飲。斂目危坐。十四日將午。面西寂然。送者麁至。祖忽開目曰。吾去卽來。生死

事大。各自淨心念佛可矣。合掌連稱佛名而逝。祖生於康熙二十五年八月初八日。示寂於雍正十二年四月十四日。世壽四十有九。僧臘二十有五。得度弟子及乞戒皈依等凡數百人。是歲臘月八日。奉靈骨塔於常熟拂水巖之西。後因鄧山諸道俗懷祖道行。迎骨重建塔於阿育王寺之右。刻有省庵法師遺書一冊。略備始末。近唯二林彭居士重訂本刊板行世。未聞有續刻者。恐久而泯沒。故續刻流通。所當亟亟也。

悟開曰。菩提心文。悲心廣大。四十八願。願力宏深。化導懇切。修持精進。一時清信之流。聞風欽仰。至今九十年矣。人猶稱之不

替焉。唯其行解真實。瑞應超卓。置之千百年中。巍然傑出。奉繼  
一代正祖。當矣。

跋

拈華一脈分列五枝。雖法道是同。而門庭稍別。故宗旨亦異也。歷代傳法之人。各宗其宗。載之五燈。皎如日月焉。其淨土一門。建立蓮宗。法道不出三經。宗旨純歸念佛。而遞代相傳。正法眼藏。固不可散漫而無稽也。茲蓮華主人。編集是冊。示余。余焚香讀已。作而曰。善哉。我佛愍念末世衆生之心。諸祖宏揚淨土之道。僅二十餘紙。了然明白。猶如摩尼寶珠。繫於七寶高幢之上。有目之徒。誰不知珍重者乎。是樂邦之左券也。賴是傳持無盡。得與五燈並燄。厥功偉哉。請亟付之剞劂氏。道光甲申仲秋朔日。同學弟悟靈謹跋。

佛學小叢書

蓮宗九祖略傳

全一冊

佛曆二九六〇年五月初版  
中華民國廿六年五月

◎每冊定價大洋五分

(外埠酌加郵費)

編輯者 悟開法師

出版者 上海膠州路七號 佛學書局

電話三五五二四

印刷者 上海新大沽路南成都路口 國光印書局

發行處 上海滬西：麥特赫司脫路 上海佛學書局

(一)上海開北：新民路國慶路  
(二)湖南長沙：玉泉街七十號

分銷處 各埠佛學書局 佛經流通處

2

910673

